



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
ZASTUPNIČKI DOM

Komisija za vanjske poslove

Broj:01,2-50-1-127-18/04

Sarajevo, 11.02.2004.godine

ZAPISNIK

sa osamnaeste sjednice Komisije za vanjske poslove

Sjednica je održana 11.02.2003.godine sa početkom u 11:00 sati.

Sjednici su prisustvovali sljedeći njeni članovi: Martin Raguž, Seada Palavrić, Milorad Živković, Nenad Mišić, Azra Hadžiahmetović, Sead Avdić i Vinko Zorić.

Odsutni su bili: Izet Hadžić i Jelina Đurković.

Zapisnik je vodila Merdžana Iglica, sekretar Komisije.

Predsjedatelj Komisije, g. Martin Raguž, nakon što je konstatirao da Komisiji nije dostavljena Informacija o stanju u diplomatsko-konzularnim predstavništvima BiH u svijetu, te da Komisija stoga na svojoj današnjoj sjednici ne može raspravljati o ovoj temi, predložio je sljedeći

DNEVNI RED

1. Usvajanje zapisnika-zabilješke sa 17. sjednice Komisije za vanjske poslove Zastupničkog doma Parlamentarne skupštine BiH, održane 03.02.2004.godine;
2. Razmatranje Prijedloga Radnog plana Komisije za vanjske poslove u 2004.godini;
3. Davanje suglasnosti za ratificiranje:
 - a) Dodatnog protokola Konvencije protiv dopinga;
 - b) Dopunskog memoranduma o razumijevanju između Evropske zajednice i Bosne i Hercegovine.
4. Tekuća pitanja.

Ad.1. Komisija je razmatrala predloženi Dnevni red Komisije za vanjske poslove Zastupničkog doma Parlamentarne skupštine BiH i jednoglasno ga usvojila;

Ad.2. Predsjedatelj Komisije je ukratko informirao prisutne članove o vrlo uspješnoj nastupnoj posjeti novoimenovanih ambasadora/veleposlanika BiH u svijetu pred Komisijom za vanjske poslove Zastupničkog doma Parlamentarne skupštine BiH i o obostranoj inicijativi da ovi susreti budu redoviti, ne samo pri nastupanju na dužnost, već i u toku mandata, najmanje jednom godišnje. Također je naglasio i značaj nadzorne uloge parlamenta u provođenju vanjske politike Bosne i Hercegovine u svijetu, što dosada nije bilo izraženo u parlamentarnoj praksi.

Gotovo svi članovi Komisije izrazili su zadovoljstvo ovakvim novim načinom rada i pristupom kojim se uvodi praksa da predstavnici bh ambasada u svijetu dolaze na redovne konsultacije u Parlamentarnu skupštinu BiH, i konkretnije u Komisiju za vanjske poslove Zastupničkog doma. Pri tome su se svi članovi Komisije složili da u provođenju vanjske politike BiH u svijetu ne smije biti unošenja dnevno-političkih i stranačkih stavova kao i da ne smije biti individualnog pristupa, već da treba postojati jedinstven pristup predstavljanja Bosne i Hercegovine u svijetu. Zapisnik-zabilješka sa ovog sastanka je jednoglasno prihvaćena.

Ad.3. Predsjedatelj Komisije je u uvodu ove tačke dnevnog reda iznio ocjenu da je prošla, 2003.godina u smislu rada Komisije završena pozitivno, ali da ova, 2004.godina treba značiti korak dalje u unapređenju rada i rezultata Komisije. Također je naglasio aktivnu međuparlamentarnu suradnju na nivou vanjskopolitičkih odbora, a kao prioritet koji još nije realiziran zbog tamošnjih prilika označio je susret sa Komisijom za vanjske poslove Srbije i Crne Gore u sklopu čvršće regionalne suradnje. Predložio je da se u programu rada Komisije za ovu godinu također nađu susreti sa parlamentarcima iz Mađarske, Italije, Austrije, Makedonije i eventualno Japana, Irana...Također je predložio da se razmatranje **programa aktivnosti za realizaciju prioriteta u 2004. godini iz izvješća Europskog povjerenstva Vijeću ministara Europske unije o izvodljivosti pregovaranja između BiH i Europske unije o Sporazumu o stabilizaciji i pridruživanju** nađe kao prva tačka u svakom tromjesečnom periodu sadržaja rada Komisije, što je jednoglasno prihvaćeno.

U daljoj diskusiji pored čestitki za dobro osmišljen i sadržajan Radni plan Komisije, druga zamjenica predsjedatelja, gđa Palavrić je predložila da Komisija za vanjske poslove u praćenju realizacije ovog programa aktivnosti bude u direktnoj komunikaciji sa Direkcijom za evropske integracije kako bi od njih imala detaljne i precizne informacije o napretku u njihovoj realizaciji. Također je naglasila da je razmatranje koncepta nastupa i ciljeva odlaska, kao i izvešća o rezultatima posjete delegacija Parlamentarne skupštine BiH u međunarodnim aktivnostima veoma značajan segment rada Komisije kako bi se osigurao jedinstven i pripremljen pristup vanjskopolitičkim aktivnostima.

Prvi zamjenik predsjedatelja, dr. Živković je, pored podrške stavljanju pomenutog programa aktivnosti kao prioritet u radu Komisije, zatražio da se uputi dopis Predsjedništvu BiH i Ministarstvu vanjskih poslova u kojem se traži da Komisiju informiraju da li postoje eventualne izmjene i dopune teksta dokumenta «Opći pravci i prioriteti u provedbi vanjske politike BiH». Također je podsjetio članove Komisije da bi trebalo razmišljati i o susretu sa svojim kolegama iz parlamenta Irske, koja je trenutno predsjedavajuća Evropske unije.

Dr. Azra Hadžiahmetović je, govoreći o programu aktivnosti, predložila da se održi zajednički sastanak sa Komisijom za evropske integracije kako bi se koordinirale aktivnosti i radilo efikasnije na realizaciji programa. Također je naglasila značaj podnošenja izvještaja komisiji sa putovanja koje poduzimaju članovi parlamenta kako bi se pratio rad i rezultati postignuti na međunarodnim skupovima i u tom kontekstu predložila da, ukoliko se izvještaji ne podnose, Kolegiji oba doma reaguju neodobravanjem sljedećeg putovanja. Isto tako je ustvrdila da treba kontinuirano provoditi niz aktivnosti na kontroli implementacije ratificiranih međunarodnih ugovora, konvencija i sporazuma, posebno onih koji se odnose na obaveze prema Vijeću Evrope.

Zatražila je i da se od Predsjedništva BiH i Ministarstva vanjskih poslova pribavi objašnjenje o davanju suglasnosti za ratificiranje memoranduma između subjekata međunarodne zajednice i Bosne i Hercegovine.

Zatim je Komisiji uputila sugestiju da se rukovodstvo Komisije uključi u rad Međunarodne konferencije o investiranju u BiH, koja će se održati 26. i 27.02.2004.godine u Mostaru, te da tačka iz Radnog plana Komisije za 2004.godinu Razmatranje Studija o ekonomskim potencijalima BiH kao osnove za njeno prezentiranje u inozemstvu prebaci iz drugog u prvi kvartal upravo zbog skorašnje Konferencije.

Što se tiče susreta vanjskopolitičkih odbora, dr. Hadžiahmetović je predložila da se upute pozivi za uzvratne posjete Državnom Zboru Republike Slovenije u prvoj polovini ove godine, a Hrvatskom Saboru uz čestitke na novom sazivu i poziv za posjetu Komisiji za vanjske poslove Zastupničkog doma Parlamentarne skupštine BiH u drugoj polovini ove godine. Također treba nastojati redovito se i sistematski susretati sa zemljom koja predsjedava Evropskom unijom.

G. Mišić je, pridružujući se dotadašnjim ocjenama Radnog plana, dao primjedbu da još uvijek nije dobra sinhronizacija posla između Komisije za vanjske poslove Zastupničkog doma, Komisije za evropske integracije i Ministarstva vanjskih poslova te da nju treba unaprijediti kako bi se aktuelni program aktivnosti uspješno realizirao.

Dr. Avdić se, osvrćući se na rad Komisije u prošloj godini, složio sa predsjedateljem da je on bio pozitivan, ali da ove godine Komisija treba ići i korak dalje te da mora imati punu inicijativu u aktivnostima. U tom smislu je uputio prijedlog da do maja ove godine na svakoj sjednici Zastupničkog doma na dnevnom redu bude ispunjavanje uvjeta za pristupanje pregovorima o Sporazumu o stabilizaciji i pridruživanju te da se krajem aprila organizira tematska sjednica oba doma na ovu temu koju bi pripremile Komisija za vanjske poslove Zastupničkog doma, Zajednička Komisija za evropske integracije i Komisija za vanjsku i trgovinsku politiku Doma naroda.

Nadalje je sugerirao da se uputi dopis svim stalnim delegacijama u međunarodnim organizacijama u kojima bi ih se podsjetilo da Komisija očekuje izvještaje, a od Kolegija oba doma informacije, pismene ili usmene, o svim vanjskopolitičkim susretima na razini parlamenata.

Dr. Avdić je predložio i da se održi tematska sjednica Komisije na temu «Ekonomska diplomacija u funkciji rasta izvoza» koja se uklapa u tačku sadržaja rada Komisije u 2004.godini oko razmatranja Studija o ekonomskim potencijalima BiH kao osnove za njeno prezentiranje u inozemstvu.

G. Zorić je dao prijedlog da planirane posjete i susreti na nivou vanjskopolitičkih odbora u ovoj godini uđu u Radni plan Komisije, te da treba predvidjeti redovite godišnje susrete sa Komisijama za vanjske poslove susjednih zemalja i zemalja u regionu.

Predsjedatelj Komisije, g. Raguž je na kraju rezimirao diskusije prijedlogom sljedećih zaključaka:

1. Komisija podržava ocjenu da se u radu Komisije ove godine ide korak dalje preuzimajući punu inicijativu u onome što je vanjskopolitička aktivnost Parlamentarne skupštine BiH;
2. Komisija je suglasna da prioritet u njenom radu treba biti razmatranje ispunjavanja uvjeta za pristupanje pregovorima o Sporazumu o stabilizaciji i pridruživanju;

3. Komisija je spremna da u suradnji sa Zajedničkom Komisijom za evropske integracije i Komisijom za vanjsku i trgovinsku politiku Doma naroda, a uz pomoć Direkcije za evropske integracije jednom mjesečno pripremi informaciju o ispunjavanju uvjeta za pristupanje pregovorima o Sporazumu o stabilizaciji i pridruživanju;
4. Komisija je suglasna da se krajem aprila organizira tematska sjednica oba doma o ispunjavanju uvjeta za pristupanje pregovorima o Sporazumu o stabilizaciji i pridruživanju, koju bi pripremile Komisija za vanjske poslove Zastupničkog doma, Zajednička Komisija za evropske integracije i Komisija za vanjsku i trgovinsku politiku Doma naroda;
5. Komisija je suglasna da se u narednom periodu održe dvije tematske sjednice Komisije na teme: «Ekonomska diplomacija u funkciji rasta izvoza», i « Uloga nevladinog sektora u međunarodnim odnosima i vanjskoj politici»;
6. Komisija se slaže da uputi pozive zemljama pozive za susrete na nivou vanjskopolitičkih odbora, kako za uzvratne posjete tako i za otpočinjanje ove suradnje.

Ad.4. Komisija za vanjske poslove je dala svoje mišljenje da su ispunjeni uvjeti da Zastupnički dom Parlamentarne skupštine BiH na svojoj 29. sjednici da suglasnost za ratificiranje sljedećih sporazuma i ugovora:

1. Dodatnog protokola Konvencije protiv dopinga;
2. Dopunskog memoranduma o razumijevanju između Evropske zajednice i Bosne i Hercegovine.

Sjednica je završena u 12:30 sati.

Zapisnik sačinila:

Merdžana Iglica, sekretar Komisije

Predsjedatelj
Komisije za vanjske poslove
Martin Raguž

